

四庫全書

集部

欽定四庫全書

安雅堂集卷三

元 陳旅 撰

五言古詩

次韻寄太乙宮上官

端居感流序階樹日滅滅涼風起高城上有南飛翮揚  
雄不微名拓落猶遠客美矣陶徵君斂裳去彭澤

我居城東南西北有殊庭病久曠冲賞懷哉松桂青曼

倩諒奇士夙受火珠經雲河淡秋夕泰時明三星

題桃花鵲圖

婀娜絳花明連娟碧雲靜金塘春水多文禽汎晴影大  
堤寫游踪日照華服靚萬物各有適况及芳歲永

次韻毘陵吳寅夫見寄

季子江海居勝友園池賞臨水詠新詩輕颺送流響丹  
花陽林吐綺翼幽竹上雲瀾阻塵躅離思徒浩漭杪秋  
辭京邑寒郭蟻吳榜宗兄念行役旨酒勞鞅掌承子共

清悰論文發豪爽我貧久僑栖所至類樂廣願得陽羨  
田寧慙五湖長夙昔詒約言遲莫嬰世網衆仙諒逍遙  
樓觀滿方丈餘霞散文席斜月生翠幌芳夕令人思思  
之不能往晨興即高岡引睇寫孤想

湖上分韻得春字

君子佩明信相期湖水濱時欣宿雨霽畫舸送遊人輕  
鷗集蘭渚佳樹變鶯晨山遠烟容澹日出水光新美人  
含麗思艷曲歌陽春睽攜會彌歡酣適趣並真茲遊敦

德誼況乃及茲辰

題楊顯民米詩卷後

夢游洞庭野斜月映疎星軒后來張樂伶倫吹鳳笙夢  
回憶其音幽渺有餘清截竹學向人世人皆不聽南州  
有高士洗耳卧岩扃涼風鳴松竹石澗響琤琤何日即  
與語曠然千古情

盧氏松菊堂

人生貴適意何必在丘園所以曠達士隱居京邑間城

東有衡宇亦復遠塵喧青松翳庭皋佳菊羅堦前撥英  
以汎酒撫松日盤桓淵明歸栗里陋邦非所安而我值  
休明此地有餘歡

分題飛龍亭為趙宗吉御史賦

冶城枕遙麓華構起層阿昔日文皇帝憑高眺山河晨  
曦上扶木寒野迎春和六龍不停馭若華翳崇柯鍾山  
生白雲淮水流素波君子懷寵光登臨幽思多

賦謝氏舒嘯亭

劉陽閔冲曠自昔君子鄉君子佩蘭茝雲路以翔翔謝  
君襲芳聞耕種在溪莊聖世宜隱居非云厭榮光籬邊  
有嘉瓜牆下有柔桑麻苧已滿區花果亦成行濯足倚  
幽碕臨風服練裳客至坐衡宇共飲樂時康酒酣仍長  
嘯長嘯適清狂客去林扉合猶聞鳴鳳凰仕宦貴適意  
往往鬱中腸寄語同聲者相求與徜徉

送金溪尹縣丞

吾聞臨川郡自昔多君子金溪畜清冲雅德著陸氏羨

子齒方富于焉學而仕為丞非劇職佐邑優政理暇日  
山谷間折節問賢士毋徒學涖民且可學治已在我既  
有餘推此以及彼君家起武弁文事固所鄙國家久治  
平四海納孔軌人言甚可畏在子擇所履儒宗虞青城  
相去不百里林逕入秋雨竹屋臨野水沿徼或過之瞻  
望以興起

送李光載辭西臺掾省親金陵

翩翩城上烏鬱鬱轅下駒芻豆或不充返哺常有餘庭



闌隔江水思之俄歲除誰能西入秦奔走奉簡書脂車  
薊門道僕馬語載驅過江動雙槳忽至石城隅慈母望  
我久此時當倚閭相見有至樂浮榮信區區

分題得鄧賠送舒嚕都元帥之雲南

滇池西南陬沃地稱純源鳳山翼廣野穹水吐厚坤武  
侯昔經營遺勝諒斯存川原集惠米草樹生奇芬聖世  
仁風暢遐徽絕妖氛元戎謹蕃宣詩禮況所敦

春山圖

春山雲木暝初日，映遙岑、林霏翳。高閣望之勞我心，幽  
徑緣崖迴飛淙，響澗深芳月。忽已晏誰哉，與登臨。

分題得南臺送山子春僉事之閩中

無諸句踐孫，有國東南陬。能從漢高帝，函谷用戈矛。賞  
功仍故封，築臺臨水頭。憶昔春雨餘，廟下艤蘭舟。載瞻  
漢衣冠，丹青煥林丘。北游二十年，日暮倦登樓。繡衣問  
風俗，于焉少夷猶。

送高敏則道州路知事

子昔來京師見我靈椿坊論交氣誼合室有芝蘭香念  
我當遠行賦詩以相將詞華蔚組繡音節鏘琳琅而子  
亦南征遊徼入炎荒契濶忽八載憑高每相望今歲夏  
五月有客至上庠欣然展良覲槐下久徜徉惟子富文  
學所用聿所長巍巍玉堂署制作須才良而今所授官  
乃復在遐方獨喜春陵郡實為周子鄉山川草樹間道  
德有餘光於此治簡書雖遠庸何傷涼風起燕臺飛雨  
下太行蘭舟曉當發河水方洋洋臨流重睽攜贈子以

佩璫願言行所知歲晚期母爽

送王致道僉憲河東分題得汾亭

昔年文中子東歸遂隱居幽亭枕汾曲於此樂唐虞鳴  
琴寫流水泚筆讀羣書夫子今邀悠清風在林墟君侯  
實諸孫訪古紆使車賸惟十二策用世當何如

安福李氏臨溪亭

結屋負南郭清溪流屋前端居塵事少水木自幽妍滌  
硯弄寒泚鳴琴寫潺湲沙鳥時近人汀雲相往還烹鮮

毛溪毛留客坐前軒逝川道體著觀物悟微言

題米元暉漂陽溪山圖

宿雨散層巘林麓翳烟霏遙山斷復連川上初昕微我  
昔困行役漂陽秋未歸幽子喬松流邂逅啓郊扉撫景  
正若此別離嗟願違覽卷遂終日溪雲欲生衣

為吳德良題承旨所贈蘭竹圖

細竹生石間幽蘭與之俱愛彼有貞節而此芳不渝空  
谷塵躅遠公子為停車懷人重移植臨風寫為圖君子

實似之歲晏聊與娛

賦雲錦溪

綠水春生渚丹花集陽林愛此雲錦好蘭舟轉溪深賀  
監謝軒冕載酒過山陰遙聞櫂歌發縹渺不可尋

日出瀛海上照見仙人宮仙人

詞

雲處

詞

翠

詞

懷慕沖賞俯首慙孤蹤吹簫薊門月一夜思江東

哭陳元麟

阿麟能讀書八歲貢京國翱翔公卿間聲譽頗籍籍我

家越山南汝家越山北及我官橋門見汝長五尺翩翩  
丹穴雛五采作毛翮崑崙種瑤樹上有實可食汝胡不  
此留而去不可即乃翁攜汝來為汝頭盡白辛苦攜骨  
歸江離黯秋夕可憐東門吳任達乃強釋

趙逢原靖康間失母三十年得之瀘南其孫求

詩

母子不相見飄零三十年飛雲散九野瀘水聲濺濺百  
川盡東注雲飛散還聚無情會相逢而況子求母淒涼

汴中宅池臺翳荒榛峽船載華髮鼓柁江南春作堂種  
護草護草日以好淮上已罷兵江南可娛老

為熊道士賦雲巢

吾聞巢居子乃在白雲間手執天地戶乘風時往還下  
民敢予侮碧族寧爾干更有鶴為馬養在松樹端

杜節婦董氏無子

杜曲有好花盈盈映春水芳月忽已晏好花難結子年  
年寒食時花落水邊墓狂風吹不去盡作墓上土白頭



不偕老千古同懷抱獨憐墓中人羨殺杜有道

答蔣伯衡茂才

蔣子雅好事獨肯勤過我助我作清事亦復無不可近  
詩精且新五色雲一朵子豈久陸沈徐步亦青瑣

題陶淵明撫松圖

原野涼風至草樹日蕭條杖筇還故丘青松在東皋孤  
陰近衡宇薄日映層標念此有貞操撫之以逍遙

題泛舟圖

江雲生白石水木澹幽姿雙松出叢薄翠色集遙枝落  
日明極浦楚岫正參差美人鼓蘭棹歲晏將何之

題郭天錫畫

郊居息塵事日夕望青山青山秋氣多白雲出其間露  
渚野芳集楓林江色寒夷猶感流序况乃曠幽攀

題楚山圖

佳竹生石渚高木連翠微遙岑宿雨霽野水明夕暉幽  
子茅宇下獨坐啓林扉所約殊未來湘雲欲生衣

韓節婦詩

雲州劉氏女嫁作韓家婦良人命不淑抱病入野土舅  
姑老無兒三子幼失父劉氏方盛年自誓不忍去寧為  
澗底松不作道旁樹道旁衆所憐澗底人不顧寒燈照  
闕

機杼膝下梨粟分堂上滫瀡具辛苦

闕

年遂作畢志慮佳兒總成立緣服娛歲暮邦人推母儀  
里婦學閭度盡言韓家好華表臨大路

和氏孝感詩

任城和氏女病久雙目盲有子曰叔方百計除昏冥巫  
醫技皆窮籲天乞光明焚香向北斗夜夜拜中庭一旦  
雲霧開高堂炯秋星攬鏡見天色恍然疑再生慈竹當  
牕綠護草遶堦青兒孫來上壽綵服映新晴鄰媼亦驚  
喜相看持酒觥乃知有天道應感由孝誠張元已親疾  
不在藥師經

送羅生還關中

岐山有雛鳳飛集軒轅臺下飲辟雍水絢羽明嵒穉天

寒采竹實欲與相徘徊鳳子忽西飛使我心悠哉  
比歲秦告饑攫人脂為餒殍荒豈無策孰弛吾君憂乃  
翁守奉先懿若元道州臨風致遠意為子登高丘

郭孝子詩

金臺有孝子郭氏名壽瑛壽瑛執親喪晝夜聞哭聲負  
土起崇塚栽松翳玄扃瘦骨寒岳立苦淚春河傾視容  
日梅梅一朝廢雙睛復扶大母柩冥行出薊城願言畢  
序葬身瘞心則寧里人問孝子過毀聖所懲孝子哭且

咎我非敢傷生有淚不哭親烏乎用吾情親死我目在  
徒能視無形黃泉相見日無用此目明吾聞壽瑛語悲  
愴不自勝昔人曾有言五色令目盲長年悅芬華眉斧  
戕心精視彼郭孝子愧色能無頽而我嗜讀書昏花散  
秋燈思親不能哭涕泗空填膺

西山詩

有序

至順三年六月之吉西山新寺之穹碑樹焉是日百  
僚無敢不至碑所余與趙博士繼清蚤作出平則門

沿大堤並駐蹕亭下轉入湖曲逢趙宗吉成漢卿二  
編脩與劉敬先典籍騎驢從蒼頭挈斚樽邀余與繼  
清就堤側藉草坐灌木延陰風冷然生磻底幽鳥鳴  
其上命蒼頭堤旁取荷為盤以實腊肉倒樽中濁醪  
飲數行甕山流黛與湖影相盪滴於盃盤巾袂之上  
余在京師七年蓋未有一適如此時也酒盡三君子  
起曰子于此能無詩乎余言歸即賦之及歸以職事  
縻繞少清趣明年二月宗吉持紙來索詩時戶外雪

深二尺無他客乃賦詩曰

蓐食出西郭初日明遠川  
聯鑣走山麓山樹盡含烟  
紫石擁馳道綠水侵莽田  
高人湖上來邂逅野礪邊  
茂柳垂密幄層莎布柔穠  
回風颯幽爽有鳥聲清圓  
采荷薦珍腴洗殘行芳泉  
芙蓉濯新雨迴立方嬋娟  
晤言攄素抱逸思慕遐騫  
窈窕紺園夕珠林映璇淵  
黃金作臺殿縹緲集諸天  
顧慙凡躅汙亟去不敢違  
適意無先期重尋有中悃  
華月忽易改賞心與時遷  
晨興望雲物浩雪



滿層巔

朗州周氏水木清華亭

迴薄林逕小有亭在山阿川原宿雨盡谿谷秋水多文  
鱗集幽渚翠羽下遶柯美人種松桂松桂今如何念彼  
不可即沅江日生波

題雲松巢圖

匡廬多白雲亦有松在山高樓若檜巢乃在雲松間茂  
苓生砌石雨氣通林巒遊子涉遠道夕鳥栖簷端終期

謝圭組歲晚適幽歡卧聆松風細起看川雲還

題清遠亭

虛室敞林薄細泉生石苔魚遊菡萏日池上竹樽開坐  
久夕雨霽微風牖間來流香轉迢遞涼意與徘徊

七言古

題蒙泉吏隱圖

世皇昔日收雲南鯨鯢伍伍手所戡烏蒙烏撒腹心地  
不有軍府誰其監漢廷遣將非充國累歲屯田無善績

兵驕民獷土不畜國帑空虛糜萬億大名劉侯文武才  
承詔萬里誅蒿萊豪蠻盡戢戎壘立竄卒復還農畝開  
有泉遠出蒙山下日夜清冰鳴石罅渠分漕決來縱橫  
土脈浮膏作秋稼府中儲積多如山陂池種魚無曠乾  
幾聞春磴響林際仍為蒹葭流圃間劉侯暇日遊泉上  
賓史追從意冲暢步隨涼影傍高松坐看晴雲起孤嶂  
朱轡奕奕來甌閩喪車邁返黃河津雲南戰骨橫四野  
布穀聲中荒草春劉侯雖死應愁絕吟魂空咽泉頭月

祇今寧謚重謀帥九原人去無歸轍  
荔支臺館開樽時  
劇談每及西南陞淒涼遺像畫圖裏  
對此流涕將奚爲

海谷

歸虛谷在渤海東八紘之水注其中  
不盈不縮浩無際  
吞吐日月含空濛靈鼇於此負山出  
上有縹緲金銀官  
人間相去幾萬里弱水滿眼多迴風  
琴高來時踏赤鯉  
少君歸去乘白鴻秦王到老不得渡  
嗟我欲往將焉從  
子房有孫海谷子告我有路非難通  
只隨雲氣相上下

與子共謁扶桑公

送王道原韶州教授

春秋大義如日星紛紛傳註夷天明唐人啖趙與陸氏  
疏別猶未窺全經宋儒往往發豐蔀後學胡乃相蒙盲  
先生寤寐洙泗上汲古獨得心源清不隨流俗論褒貶  
善惡無以逃其形書成臺閣爰刻薦講說弟子盈門聽  
上庠評校忝屬我寸莛豈足宣鏗鉤細旃廣廈得前席  
啟沃真可裨昇平奈何載道適南越白雪滿鬢秋衫青

橫經定有龍戶集擊磬應聞鳳鳥鳴  
遠人從此識古學  
風教所寄良非輕都門買舟著書副  
江上雨足新涼生  
天南何處有歸鴈作詩百紙寬離情

謝氏祖孫創澧陽橋

涿陽極目雲氣昏衝風揚波鼉窟翻  
湘妃抱瑟望虞舜  
日莫江竹多啼痕木蘭為舟不可渡  
誰幻層淵作平路  
天橫夜靜牛渚長海市朝晴蜃樓吐  
祖孫移山山可移  
昔人不信今見之千年猶有召伯棣  
白面聚斂嗟何為

友人祀墳少作圖錄之

溪村積水生寒烟書廬睡起清明天隔溪暮哭人飯鬼  
塋間燒錢野風起酒旗山前雨疎疎來禽花底飛鷓鴣  
荒墳累累出新草草長如人人又老東門大道青楊間  
可憐車馬無時閒

題虎圖

於菟嘯林風怒生草木瑟縮空山驚斧牙鑿齒新發矚  
去食田豕求西成伊昔報祭先嗇并誰復罵汝偷犧牲

包生盤礴圖金睛懸之高堂氣憑陵游光野仲急遁形  
西阿執鉞神赫靈

藏六詩為林恬齋作

禹煥中野螭欵洽流水青黃背疇錯五含九六中算約  
舉六藏之九斯作人言天地猶索籥陽氣流行電磅礴  
蛇甘即且蜩辱鵲子能深強有真樂陽精純凝乃脫廓  
掉頭不肯支牀脚

為蕭元泰題龍虎山出圖



龍虎之山仙所家我昔夢寐游其間乾坤風氣結沖秀  
中有正一玄都壇羽人授我九節杖林磴窈窕窮幽攀  
金宮藥殿起寥廓翠崖丹巘深迴環峯頭時飄白菡萏  
石上盡種青琅玕諸岩一覽二十四總似瀛渚蓬萊山  
清溪浮空引雪練遠岫隔水來烟鬟就中仙岳更奇絕  
上有玉樹皆檀欒虹光半夜出林杪云是石室韞神丹  
欲求刀圭已衰疾羽人去我如飛翰褰裳磻曲采芳草  
斷猿疎雨春山寒覺來俗事日滿眼歲月冉冉隨驚湍

會稽蕭氏忽相訪笑以此圖令我看夢中羽人貌真似  
而我別後鬚毛斑題詩聊復紀疇昔願拂塵服齊鸞

題白玉蟾贈劉丹晨暑月詩後

玉蟾先生列仙儒夙昔夢見冰雪如丹晨不比劉師服  
彌明本解人間書紫清午榻松陰冷俯視塵寰真火井  
銀河夜靜浴明月水風吹落玄雲影玄雲盤屈龍虎章  
百神守之不敢將

胡古愚為其僕袁普作傳王師魯賦詩用事甚

博輒撫其遺餘為詩和之

世族之降為卑隸人世升沈自常事句章袁普本故家  
淪落來依太史氏太史典故羽林屯普也服役頗辛勤  
頗似顏家得銀鹿又如王氏使青猿子淵立約真可笑  
彼若輸心不相拗結車已肯送窮鬼下狀仍堪論惡少  
太丘無僕不自聊何時定把漁配樵更尋阿對灌蔬圃  
未暇殖貨師齊刀胡公掉筆嘲孤客客笑胡公未為得  
長卿才思應過人批得文君併僮百却憐待制王先生

只為袁普之灤京平生我識越石父解驂遲汝相將行  
陳新甫生日出紅玉盃飲客為賦紅玉盃

崑崙東阿含海日石中玉子如日赤神工夜發昆吾刀  
剗作金盃盛酒喫蟠桃初開緜母家丹露滴入芙蓉花  
廣陵公子酒如海年年顏色襯朝霞

題天台桃源圖

天台一溪綠周遭溪南溪北都種桃東風吹花開復落  
遊人不來春水高錢塘道士張彥輔畫圖送得劉郎去

昨夜神鵲海上來洞裏胡麻欲成樹

明妃出塞圖

昭君北嫁呼韓國巫山更有昭君村黃金鑣鞍玉驄馬  
分明載得巫山雲涼風吹動釵頭鴈一曲琵琶寫幽怨  
沙草遙連雞庭塞野花不種鴛鴦殿內家日日選娉婷  
淚痕滿袖空多情漢廷自此思信重美人身比鴻毛輕

蘇伯脩往上京王君實以高麗笠贈之且有詩  
伯脩徵和章因述往歲追從之悰與今茲睽

攜之歎云爾

往年飲馬灤河秋灤水斜抱石城流青城丈人來水上

揭謝蘇王

曼碩敬德  
伯脩君實

皆與遊顧予濫倚橋門席日斜去

坐鼇峯石夜涼共飲明月樽醉眠更聽高樓笛灤河九  
曲來濺濺自我不見今三年蘇郎又扈屬車去佇望弗  
及心茫然龍門峽中雲氣濕山雨定洒高麗笠別意遙  
憐柳色深歸心莫為鵑聲急不才未許收詞垣賦成何  
日奏甘泉人言凡骨難變化為我致意青城仙

題胡氏殺虎圖

沙河野黑秋風粗  
棗陽戍卒車載弩  
道旁老虎夕未餬  
車中健婦不見夫  
倉皇下車持虎足  
呼兒授刀割其腹  
夫骨已斷不可續  
泣與孤兒餐虎肉

小混沌

魚腹滿中石方氏得之加今名

大圜縣鵜舍清津  
倏忽多事中央死  
玄精散作萬星樂  
天椽不堪參墮趾  
日化七十皇有虺  
蜀雷難直絢林委  
殺妖壺涿驚弗燬  
剡剡靈光照寒泥  
老龍乘磧用師紀

俾作魚麗陣中士風雲往來江落水虎臂難回玉生子  
細文素肌溫栗理方叔得之驚且喜羃蒙錯綺繡髹篚  
閉門乍觀戒貪褫烏虜混沌乃若此吾終乞之還汝始

送趙博士還聞喜展墓

渡江丞相忠簡公意氣不減王茂弘騎鯨海上作風雨  
故國山河夕照中丞相先人葬河朔蓬顆摧藏麟滅角  
橋門有客丞相孫西望歸雲雙淚落彬彬學子傳詩書  
誰為王式歌驪駒車塵忽集都門道野水遙生董澤蒲



僕夫繫馬塋邊柳子弟牽羊輦村酒里中老父喜更悲  
胡不歸來今白首人生南北兩悠悠相見俄驚二百秋  
我亦飄零去鄉土酒酣獨奏江南謳

豫章紫極宮太古樓

誰云仙人好樓居仙人結屋在太虛夜涼河影動牕牖  
日暮雲氣浮江河人生萬劫同天地倚欄無限太古意  
麻姑歸去海復深秋風吹老人問世嗟余好古空讀書  
所見無過數千歲明年江雨未開船聽說無懷以前事

為江道士賦清虛

人言天上清虛府中有萬頃琉璃田秋空紺滑不可上  
翠房玉戶扃嬋娟道人有月常滿郭只在黃庭方寸間  
重樓露氣浩如水絳河夜轉崑崙巔

分題送方叔高江南得車遙遙

車遙遙薊門路高麗驕馬不受鞭方郎得官上車去薊  
門南頭盧水流燕姬十五居酒樓彈箏唱歌折楊柳落  
日車前勸郎酒南陌行人往復來幾人似郎得官回郎

車莫驅傷馬足車中本載連城玉車遙遙鄔子洲賣車  
買船載旗鼓晴湖風輕聞擢謳

崇碧軒詩

有序

江西張繼明居進賢山中屋前後皆高嶺前嶺曰瀑  
盆蓋謂飛瀑若塵盆然門臨清溪溪受飛瀑張氏有  
田如千畝溪行田間後嶺傍有深谷多古木屋東為  
軒四楹豫章松竹雜樹與山俱青因名軒曰崇碧奎  
章學士虞公為大書之繼明又來錢塘求詩於余詩

曰

豫章山中多豫章大松長竹相扶將屋東微見紅日動  
簷曲偏令翠雨涼洗空絲瀑落溪艇暖客錦苔鋪石牀

何時到子軒下坐太朴顯民同瓦觴

危太朴楊顯民皆  
繼明之所嘗游其

居又相  
近也

題遼人射獵圖

美人貂帽玉驄馬誰其從之臂鷹者沙寒草白天雨霜  
落日馳獵遼城下塞南健婦方把鋤丈夫邊戍官索租

題趙紹隆倦繡圖

籠碧紗厨掛秋水藕風吹香團扇底琵琶彈歇宮畫長  
釵落雲邊九雛紫二妹誰是薛靈芸繡得金塘兩鴛似  
宮奴夕殿喚更衣露濕銀牀響桐子

為趙敬叔賦漢海獸葡萄鏡蓋鄭夾漈家故物  
也

尚方老冶收精銅金膏玉髓開腫膿未火曉月低青桐  
六月秋井生芙蓉當塗妖鬼負神器銅人登車數行淚

寶奩偶落長安市來與人間照珠翠凝陰空祭江心龍  
海雨夜入闕王宮一朝愁殺滌上翁破屋日夜穿晴虹  
西苑野露堪作酒中有駒駝活欲走趙侯得之莫失手  
龍女鮫童俟之久

和蕭秀才歌風臺

歌風臺前野水長王媪賣酒茅屋涼酒邊老父說劉季  
頭戴竹冠還故鄉山河霸氣已銷歇颯颯老柳吹斜陽  
臺前小兒更擊筑筑聲更似一侯章

送朗州周子嘉主簿來安

阿翁起屋敖山下阿兒作官滁水邊  
滁州真似朗州好落日采蘭汀渚間  
縣官何必好生事把酒去看琅琊山  
阿翁日望好消息家書只報縣人安

慶元玄妙觀新種檜樹生成鳳冠

老檜何年化牛去仙人築壇栽小樹  
靈根下飲丹砂泉翠氣遙通石門雨  
寶冠百葉青荷開威鳳獻舞衣迢迢  
漢宮不種珊瑚樹有客持圖海上來

五言排律

次韻蘇伯脩尚書孔廟慶成詩

御史孔用道以  
上丁致祭且樹

碑  
云

聖皇遵祖武熙代闡人文魯邑宮功懋齊民道化殷祿

綈頒厚渥翠琬

如充切  
美石

篆靈勲祀超羣望休光照九

墳六莖時入奏百末夜流熏服嘒曾孫敏趨庭舊禮聞

告成牲饗

闕

承事駿奔勤廟作知民若神歌樂我員精

神通胪蟹嘉貺集氛氲史克人能頌永歌堯舜君



送葉天根南還

我識天根子于今二十年吹簫來翠嶺鼓枻入丹淵日  
出扶桑底雲生建木巔人間方夜半海上得春先老我  
江湖迴微官歲月遷荒泉流竹里冷雨浸芝田髮短何  
為者君歸重惘然飛霞浮夕景定在石林邊

陪趙公子遊蔣山即席次李五峯韻

弭櫂丹陽郭鳴鞭白下山晴原烟翳翳幽樹烏闌闌石  
液玻瓈碧雲根瑤殷佛岩開細菊僧徑入叢菅雨洗

川容淨潮隨野色還六朝有幽事盡在夕陽間

南山詩

山在龍虎山南張宗師藏劍舄之地曰丹丘有小石洞門王津澗月橋天鑑池

金沙井躍泉漱雲亭山雲閣丹桂塢桃花源云

江左羣山園仙丘倚太霞上清分亢爽南谷抱谿研臺  
觀黃瓊宅林巒赤虎家天池開寶鑑日井射金沙桂殞  
秋岩栗桃烘曉岸葩泉香通美竹雲液漱靈芽俯澗松  
偏潤緣崖逕自斜幽亭宜水遶晴閣受嵐遮神舄丹局  
祕玄關紫氣賒石橋留月色銀浦渺皇華願解延陵劍

終乘博望槎臨風一解逆食我棗如瓜

次韻許左丞從車駕遊承天護聖寺是日由參

政陞左丞

銀甕呈山麓

地名甕山

鑿輿際水鄉離宮疑駁駘行殿傲飛


翔細浪魚鱗蘘輕颺鷁首驪扶桑明遠岸析木度高檣

屏翳時清蹕豐隆夙啓行衛兵環越棘舞女蹋吳航漸

覺仙樓近微聞梵鐸揚石壇登案衍瓊佩襟璆鏘夕渚

休蘭擢春壺瀉桂漿伊蒲頌內供蒼葛散林香罷宴蛺

旌動開帆獸錦張  
莽田低碧樹馳道出金塘  
畿甸嚴車輔臣鄰重室  
廂方欣麟在藪復喜鳳鳴陽  
聖主需賢急嘉猷賴弼良  
從容承顧問烏奕拜恩光  
文彩堪華國芳菲正滿堂  
協忠成泰治流澤徧遐荒  
援古言應切匡時慮更長  
誰哉疲土木況乃象為廊



安雅堂集卷三

欽定四庫全書

集部

安雅堂集卷六

四至

詳校官編修<sub>臣</sub>曹錫齡

中書<sub>臣</sub>劉源溥覆勘

總校官檢討<sub>臣</sub>何思鈞

校對官學正<sub>臣</sub>周 鉉

謄錄監生<sub>臣</sub>趙金簡

欽定四庫全書

安雅堂集卷四

元 陳旅 撰

序

國朝文類序

元氣流行乎宇宙之間其精華之在人而不能不著者  
發而為文章焉然則文章者固元氣之為也徒審前人  
制作之工拙而不知其出於天地氣運之盛衰豈知言

者哉蓋嘗考之三代以降惟漢唐宋之文為特盛就其  
世而論之其特盛者又何其不能多也千數百年之久  
天地氣運難盛而易衰乃若此斯人之榮悴槩可知矣  
先民有言三光五岳之氣分大音不完必混一而後大  
振美哉乎其言之也昔者南北斷裂之餘非無能言之  
人馳騁於一時顧徃徃囿於是氣之衰其言荒粗姜元  
無足起發人意其中有若不為是氣所囿者則振古之  
豪傑非可以世論也我國家奄有六合自古稱混一者



未有如今日之無所不一則天地氣運之盛無有盛於今日者矣建國以來列聖繼作以忠厚之澤涵育萬物鴻生雋老出於其間作為文章龐蔚光壯前世陋靡之風於是乎盡變矣孰謂斯文之興不有關於天地國家者乎監察御史鎮陽蘇天爵伯脩慨然有志于此以為秦漢魏晉之文則收於文選唐宋之文則載於文粹文鑑國朝文章之盛不采而彙之將遂散軼沉泯赫然休光弗耀于將來非當務之大缺者歟乃蒐撫國初至今

名人所作若歌詩賦頌銘贊序記奏議雜著書說議銘誌碑傳皆類而聚之積二十年凡得若干首為七十卷名曰國朝文類百年文物之英盡在是矣然所取者必其有繫于政治有補于世教或取其雅製之足以範俗或取其論述之足以輔翼史氏凡非此者雖好弗取也夫人莫不有所為於世顧其用心何如耳彼為身謀者窮晝夜所為將無一事出於其私心之外至有為人子孫於其先世所可傳者漠然曾不加意遑及他人之文

與天下之事哉覽是編者不惟有以見斯文之所以盛  
亦足以見伯脩平日之用心矣伯脩學博而識正自為  
成均諸生以至歷官翰苑凡前言往行與當世之所可  
述者無不筆之簡冊有國朝名臣事略與是篇並著廷  
論以文類猶未流布于四方也移文江浙行省鋟諸梓  
伯脩使旅書所以纂輯之意于編端庶幾同志之士尚  
相與博采而嗣錄之

經筵唱和詩序

古人有言曰天下重任唯宰相與經筵周成王能成其德由周公以傳之也是豈過為高論者哉我世祖皇帝道參元化明並日月宜無待乎儒者之助矣萬幾之暇命許文正公與諸儒講堯舜孔子之道以登中統至元之盛夫以世皇上聖猶不能無賴乎此則世之為人君者能無賴輔導之功乎文皇帝以明宗有觀書之喻開奎章閣延學士大夫敷陳皇祖寶訓暨諸格言緝熙光明以師表天下而在位弗永志有未遂也今上皇帝

以明考元子入紹大統有志祖宗之事御極之初即命  
兩丞相與賢臣碩彥之在著定者以聖謨嘉言與凡經  
籍所載可以充廣聰明增崇德業者一月三進講上接  
聽不倦而時有愷惕之色於是益優禮講官既賜酒饌  
又以高年疲於步趨也命皆得乘舟太液池徑西苑以  
歸聞者皆為天子重講官若此天下其不復為中統至  
元之時乎今監察御史鎮陽蘇君伯脩時為授經郎兼  
經筵譯文官論定其說使譯者得以國言悉其指歸沐

日又賦詩鋪寫盛事約同館之士與京師能詩者和之  
彙為一卷不鄙謂旅使序之嗟乎儒者之用心亦苦矣  
敝精神方冊之間莫不欲售其說于人主使四海之人  
咸被仁義之澤奈何自孔孟以來儒者之每不遇於世  
落落也程正叔氏以名臣薦身際元祐之朝似可以行  
其學矣崇政說書懇懇忠藎卒無所售而去況其他者  
哉然則儒者得以所蘊進納於其君實千百載奇遇幸  
會也又安得不歡欣鼓舞而形諸詠歌也哉此伯脩與

諸賢之詩所以作也後之君子想見元統之治將於是乎觀焉

送王紉圖還河陽序

國家初置成均本教國人子弟因寢及其餘焉國人子弟之所以學者非專尚乎文辭之葩華也訓詁之繁瑣也與細儒曲士角分寸於觚翰之間也醇龐之質偉茂之器固將有以成其美而慎收之氣儻蕩之習亦欲有以變其故爾成周之造士也七年考其小成九年考其

大成至是不率教者盡變不變王親視學又不變則為  
之三日不舉蓋學所以變氣質也不變則棄人也為君  
師者能不以是為己責哉蒙古生旺扎勒圖入學甫三載  
予見其貌魁岸而善祥其意濶達而款懋其言辯暢而  
縝理生之質亦善變矣揚子雲有云君子弮中而彪外  
也生之著於外者若是其必有所得於其中乎歸見父  
母父母必喜曰吾子去我久而能異於昔矣里中父兄  
來覲生必亦曰不見生久生異於昔矣吾知由生而有



興起者焉吾知由生而有慕國學之為教者焉吾知生  
由是而益有以自勵者焉其行也同舍生為求言序以  
勉之

送柿溪州蒙古學正序

無懷氏封泰山以來字體之變尚矣其可考者古文作  
於蒼頡大篆作於史籀小篆作於李斯隸書作于程邈  
以至繆篆蟲鳥草書八分等書又紛然雜出秦漢之間  
因時制宜蓋未始有定畫也皇元因造字以新天下之

耳目諧聲以該六書之會母字四十一而變無窮焉故  
非智融而器疏者不足以詣其妙大梁程生某蚤為

闕

人又善書得晉人筆意故學國字即夢出輩流翰林院  
試書言用為澧之柿溪州學正將行余告之曰書於六  
藝非小数也天下之大而號令之行也書行之萬世之  
遠而事之傳也書傳之故周官有保氏之教漢法有太  
史之試後世又設博士弟子員以專其業良有以也况  
今國字之為書也有我朝之大訓在焉設官內外將以

同天下之文而布聲教於四方也其為職不亦既重矣乎  
澧為遐壤學正能使其人習通其業則亦有補於當世矣  
講授之暇毋徒歌楚辭於渚蘭汀芷之間取柿溪霜葉  
悉書之筆勢當益進國家將磨皇之板書無前之盛烈  
且召子矣

閻主簿孝行詩序

霍邑人閻祿由蒙古字學教授除臨汾縣主簿未上而  
母死哀毀踰節廬墓以終其喪先是喪父亦如之鄉黨

稱其孝有司上其事朝省將有所褒嘉焉與往來者求  
搢紳為詩美之余書其右簡曰古者人無不學學所以  
求至於成人也夫司徒以鄉三物教萬民而賓興之曰  
六德曰六行曰六藝缺一則非成人况可遺其所甚重  
者乎故保氏教國子以藝儀必先審以師氏之德行三  
代聖王治效之隆往往亦由在官者之有是學也後世  
之為學者岐道藝而二之以為敦德未足以動流俗而  
術藝有足以徼亟用為進身之計常有餘於為人之道

則不足夫書六藝之一而孝者六行之元也人知國字之足以進身而競習之曾亦知大司徒與師保氏所以教人者乎閭君以字學入官而篤於孝行如此庶幾知古人三物為教之意矣他日臨民寧無以厚其俗乎

贈沙井徐判官詩序

天山之北臯陸衍迤聯亘乎大漠趙王之封國在焉王得選吏治其人豐州徐君善卿起家為沙井路總管府判官善卿嘗事王于邸王愛其倣儻而有學欲薦諸朝

而大用之善卿獨曰沙井獨不足行吾志乎乃條其所  
宜施于民者行之不以激為廉不以察為智苛除繞解  
有西漢循吏之風焉民舊業畜牧少耕種善卿始勸民  
力穡而生民滋厚又設學校以教之而民俗日殷輿人  
誦之曰我有廣野天山之下昔我善牧今我善稼我庾  
既作又穀我以學徐侯徐侯毋舍我而邈秩滿民上治  
狀留之王曰使理吾國皆若徐判官吾何慮焉乃以國  
人之請移中書復任之於是吾黨咸賦詩美之余聞之

民曷生乎食之也曷馴而寧乎教之也有虞氏命稷播  
百穀即命契敷五教當時命官莫此為急繼命皋陶明  
刑不過為弼教之計爾三代制治寢密大要無出乎此  
後世以能吏稱者未嘗知有教養之道唯恃刑法以行  
其所欲為者而已矣嗚呼此後世之所以不古若也徐  
君位卑且佐理荒落之郡而能以教養為政若此使得  
專任中上牧守之寄其效又何如哉

亂石湫禱雨詩序

泰定戊辰之歲陝右大旱民日益困有司散利去幾索  
鬼神莫之能禦六盤染織提舉燕山馬君愀然曰天人  
之相去邈矣職位之有守不可越矣然亦有流通而無  
間者乎吾雖非守土臣然食其祿者憂其事也况吾祿  
實出於民而諉曰閔雨非吾職也是豈仁人之用心哉  
即屏葷酒沐浴齋戒輒俸錢買薌幣祝奠之物負之行  
五十餘里至亂石湫拜奠而默禱焉忽靈風生水上如  
神騰鬼趯湫底湧出樽酒流抵岸側若將授君者左右



咸驚異以為神所以表精誠而昭嘉貺也宜拜貺君再  
拜受而飲之以器入湫水迎至郡城寘諸叢祠有雲隨  
軒蓋大澍連日槁者蘇仆者起愁歎亡聊者鼓舞而驩  
欣民于是歌頌焉君如祝東長生焉余聞君為人正而  
靜居官以廉介自將是宜有以格神明也易曰東鄰殺  
牛不如西鄰之禴祭實受其福吾於焉君有以知其然  
乎

送無錫州知州王誠甫序

都水監經歷王君誠甫出知無錫州而徵言於余余惟  
淞右租賦甲天下歲轉粟京師數百萬石比歲東南大  
雨水吳幾沼焉而無錫為淞右大州為州牧者其責亦  
重矣誠甫豈弟君子而婉畫水曹最久也凡天下川澤  
壅疏與五溝五塗之制莫不熟講而周知之出而為是  
州豈非上之人所以用誠甫之意乎書曰三江既入震  
澤底定今三江皆已入海而無所湮滯乎震澤底定而  
無所湔湔乎吾知誠甫必有所建白而防庸之大荒大

札舍禁弛力薄征緩刑之典吾知誠甫必有所申明而興行之惟趣集租賦而民隱之不恤則非長人者之道也是州泰伯始入吳所居之地也民之衣食既足因其舊俗而教之以禮讓之節囹圄空虛頌聲作於田野此又上之人所以用誠甫之意乎予他日南歸將卜居於茲未必不及誠甫之德惠也

喬生孝義詩序

京師首善之地跂行喙息親接神化故雖愚夫愚婦有

日遷善而不知為之者況知有陰陽五行之理而徵於日用彞倫之間者乎喬生顯京師人知讀書能以人生年月日時鼓策推步遂知來物人有懷疑不能自決者輒向生決之能示人以禍福趣舍之機無不應生事親有過人之孝友愛昆弟同居無間言閨門肅雍未嘗有疾聲厲色人益重之於是朝廷旌其門為孝義之門客有欲為生求詩於人為予言若此余謂生非藝術人也莊君平隱于卜筮與人子言依於孝與人弟言依於順

與人臣言依于忠生之為術必亦若君平之與人言者  
乎夫身有之則其言親切而有味吾知生之言必易於  
感人其孝友不獨行于家而已也有人如生大夫君子  
能不為之賦詩乎不然天新雨道少人試詣生與言如  
何

石氏節婦詩序

國子生王翼來言曰吾完州俗美男義女貞石氏女二  
十嬪于滿城夫曰王德僅兩歲并即荷戈與父從軍南

行矣夙乾中毒雨腐肌殞于戎行不得視父母與妻孥  
哭水許招魂以葬願糜此身為彼骨上土顧家有二老  
而兒方呱呱竈晏弗煬體無完襦奈何棄去而與良人  
俱於是飲泣支僊還入室堂思曷為養惟婦功是戚夕  
鐙而纊晨筐而桑澤器欄灰渥帛漱裳力營食衣以保  
尊章使安彊廿年皆以壽終若不知其子之亡彼呱呱者  
瓚齒與德茂誦詩讀書皆母之教石氏今死年六十五  
臨絕語瓚謂吾可以見爾父瓚懷母恩悲不能言以歌

詩所傳能永被乎箎絃故託翼來乞書其實以徼惠於諸賢

送索士巖燕南憲司經歷序

索君士巖除燕南憲司經歷將行徵贈言旅之言曰天下大物也天子與宰相勢不可獨治之于是設官以分治官衆不能皆得人也德澤之未流民隱之無愬姦貪賊蠹之無所懲畏于是設風紀之官以繩糾之其為任可謂重矣天下憲司凡廿有一道燕南居其首焉其地

咫尺國門外實先宣風以為諸道望而一出言一舉足  
即聞朝廷之上其任可謂又重矣憲司官若吏權皆足  
以制郡縣禍福人而事不當律令幕官不署文書不得  
行使者雖行部遠外會議事幕官亦與裁之則其權又  
足以制夫妄禍福人者經歷元幕也其為任可謂又益  
重矣士巖此行集三重焉若之何而任之夫智力足以  
任天下之重而力有所不及智有所不周矣天運行而  
不息也地凝然而不墜也誰實任之曰氣誰實任氣曰



理然則惟理可以任天下之至重者乎講學以明理制  
行以養氣此古之人所以大有為于世也士巖擢高第  
入史館又從事御史府布武華要之衢而每退然若不  
勝衣君子於是乎知士巖之學矣然則士巖今居憲幕  
可否事必不以區區智力與人較爭短長其務以理勝  
不以言勝者乎雖然是猶非天下之至重者也士巖當  
益思所以任夫至重者哉

送李中父使征東行省序

高麗在我朝如古封建國得自官人其秀民皆用所設科仕于其國皇慶間詔大比天下士自是始有試禮闈者然多綴末第或授東省宰屬或官所近州郡既歸即為其國顯官鮮更西度鴨綠水者夫自封建既廢天下仕者無不登名王朝其勢然也今高麗得自官人而其秀民往往已用所設科仕其國矣顧復不遠數十里來試京師者蓋以得於其國者不若得諸朝廷者為榮故雖得末第冗官亦甚榮於其國况擢高科官華近為天

下之所共榮者乎元統元年天子親策進士旅叨掌試  
卷簾內高麗李穀所對策大為讀卷官所賞乃超寘乙  
科宰相遂奏為翰林國史院檢閱官亦榮矣明年制詔  
天下興學校中父得捧制書東還且將以其舉于朝廷  
者悅乎親以及其鄉黨也余壯其行告之曰子歸見邦  
人諸友宜言上文明立賢無方未嘗鄙夷遠人如曾青  
丹砂不產于中國而中國實用之士患不適於用不患  
中國之不已用也不然興學之詔何以遠頒于茲土哉

易之漸曰鴻漸于逵其羽可用為儀吉吾將見揚翹于東方者與中父翩翩而來儀乎

劉沂州慶壽詩序

臨沂劉瓚文瑞為集賢都事時其父信甫母田夫人已推恩拜官封搢紳為文辭榮之今瓚官儀曹秩五品信甫又以子貴拜奉訓大夫益都路沂州知州飛騎尉臨沂縣男田夫人封臨沂縣君沂州今年八十有八夫人八十有二於是大夫士又為歌詩以誦詠其福履之盛

屬余序余嘗觀于樹藝之事矣生息蕃廡而利之收倍  
焉者必風雨之時土地之沃而人事之周也三者缺一  
焉則其生也弗遂惟人亦然天之所畀者厚身之所積  
者充子孫之孝養無不至則其所享必有優于人者矣  
彼有所不足者非賦予嗇于有生之初則培植不加于  
有生之後甚至戕其所得於天者不然同生宇宙間何  
萬有不齊哉沂州孝友忠信能冲澹以養父心勤約以  
資生畜書以教子捐貲以周人之急而善德又足以善

其里俗伉儷皆登上壽居鄉邦受祿養安強夷愉無有不愜於心豈非得之天者厚積之已者充而養志者之無不至而致然歟嗚呼何沂州於斯三者之獨脩也漢官儀三老五更取男女完具者則入雖有德有壽又必以有子為可貴況有子篤於孝又以寵祿及其親乎雖然吾聞化國之日舒以長方今四海寧謐和氣充塞沂州得享安榮於壽域之內則得于朝廷者多矣又不但三者之脩也

送劉粹衷赴旌德令序

劉君粹衷之為旌德令也客有過予而言曰粹衷名進士其為人也和而易宜在館閣為文章從容措紳間奈何治縣難治也必有彊明之才而後可以剴劇粹衷奈何治縣予應之曰子以後世之吏求粹衷乎世以彊明稱者未必良吏也彊而無以養之必嚴刻明而不善用必苛察以嚴刻苛察而施諸政亦難為下矣大抵若是者皆急於近名近名非良吏也古之君子未嘗有心

於治人而人未嘗不治於君子誠以待物則物無不孚  
公以蒞事則事無不當君子之身禮樂之器也政教修  
禮樂之用行焉禮樂之用行民將不治而化矣是可與  
嚴刻苛察者言哉孔子曰斯民也三代之所以直道而  
行也蓋民不難治後世無善治之吏於是乎有難治之  
民及其難治而又急之則所治者與治之者俱困矣詩  
不云乎豈弟君子民之父母孰謂和易者不足以治縣  
夫麟儀儀鳳師師不鷙不獍飛者走者莫不為之先後



麟鳳亦何用其驚與獐哉粹衷方將為麟鳳于旌德旌  
德之人方將先後之不暇而子顧以向者之言惑之無  
乃不可乎客唯而去明日粹衷來別因述與客言者為  
粹衷道之

周此山集序

風雅頌不作詩之變屢矣大抵與世相為低昂其變易  
推也近世為詩者言愈工而味愈薄聲愈號而調愈下  
日鍛月鍊曾不若昔時問卷刺草之言世德之衰一至

于此我國家以淳龐大雅之風丕變海內為治日久山川草木之間五色成文八風不奸士生斯時無事乎文章而其言自美況以文章而歌詠雍熙之和者乎周此山先生自括蒼來京師訪予靈椿寓舍與語竟日知能為詩因索其所作觀之何其言之藹如也夫志得意滿者其辭驕以淫窮而無所遇者其辭鬱以憤高蹈而長往者其辭放以傲先生懷才抱藝蚤有意於用世既而託迹丘園不見徵用且老矣今考其詩簡澹和平無鬱

憤放傲之色非有德者能如是乎傳曰溫柔敦厚詩教也先生可謂有溫柔敦厚之德矣予官橋門七年凡四方文字當程校者皆與寓目焉嘗疑山林間必猶有可觀者未之見也此詩蓋余所謂未見者乎因為選其最佳者得若干首題為周此山先生集云

丁氏世譜序

周小史莫繫世辨昭穆其世譜之攸作乎夫繫世固邦國之志然凡得立宗以綴其族者非有譜識所從出條

所由分則世遠族衆其繫必紊而昭穆之辨淆矣此世譜不可以不作也餘不丁氏吳興大姓也昔國家用兵江南時其家文籍盡散軼世緒無所于考清溪君道純蚤已出家為道士乃惕然以為隱憂蒐遺討殘積以歲月作丁氏世譜一卷幹枝扶疎綱網聯絡而凡祖考告身舉削遺文墓誌咸載又求誌之不存者買佳石重刻之作時思菴墓側徵記名人與是編共傳于死窮嗚呼六十年来故家子孫宅宅田田有不能道其先世一事

者孰謂丁氏世譜乃出于其後人之出家為道士者乎  
丁氏三世武弁至宣教公始力學登進士第為天子史  
官斯亦榮矣典教南康日嘗忝訂朱氏儀禮經傳通解  
鋟梓以行於世夫先王之為教也莫重于禮禮經亡缺  
之餘莫脩于此書朱子于此蓋終身拳拳焉然則譜中  
所載事實此其最章章然者也又何必以他功業自見  
於世哉余謂禮所以秩人紀也世譜作則人紀秩而禮  
行焉丁氏世有禮學宜能作是譜歟或曰老子為周史

為禮師清溪君又有得於此歟

祭器圖序

元統三年春太廟署言延祐中朝廷遣官至錢塘造太室祭器工物精純俱中法度乃者文宗皇帝升祔器皿趣辦一時視列室所陳功苦弗類宜用延祐故事更造之太常以其言言諸禮部而上于中書中書移浙江行省如所請而遣太常從事曰伴住者來視工於是行中書省參知政事富珠哩某與左右司都事李某任程督

事有司承命唯謹以是年六月壬申為治鑄尊罍彝豆  
登銅簠簋盤盂之類凡百有四事吉金在銘範制  
孔良錯鏤磨治光潤龍變八月己未告成載如京師夫  
禮非器不存而敬者禮之所以存也器有未善則所存  
者有不足矣先王之於祀事所以脩物而致美也今天  
子以仁孝承宗祧以禮樂風天下歲時裸薦登降俯仰  
之間敬之所存其不在斯乎

送甘允從甫北上序

天可得而知乎曰天難知而理可尋霜未隕而裘褐製日未入而膏燭具何也人知燠寒晝夜之必相代而至也夫既知其必相代而至也而或戚戚於未至或用其知力以求其所不必至是皆謂之不能知天陳留甘允從甫年少富才華天歷中遭逢聖明得在廷閣從搢紳先生纂經世大典方進用俄以病去久之來江南補行省掾又拓落不偶於是閉門讀書治文章窮巷草減屨而允從之學大進矣夫蓄之厚者其用舒鬱之久者其



連茂允從去此其將有得于天乎天何心哉盈虛消息  
相推而至者天不能嗇於人而人不能辭於天也今中  
書左丞耿公器識宏朗位高而禮恭海內之士咸願進  
見冀得展布尺寸况允從有知遇之素顧不得少自見  
於宰都物之地乎吾知允從將有得於天者殆亦於是  
乎卜之嗚呼余閱世深矣事皆不足據惟天最可信允  
從其行矣哉

安雅堂集卷四

欽定四庫全書

安雅堂集卷五

元 陳旅 撰

序

宋景瀛文集序

金華有二先生曰柳公道傳曰黃公晉卿皆以文章顯  
名當世予遊薦紳間竊獲窺其述作柳公之文龐蔚隆  
凝如泰山之雲層鋪疊湧杳莫窮其端倪黃公之文清

圓切密動中法度如孫吳用兵神出鬼沒不可正視而部伍整然不亂金華多奇山川清淑之氣鍾之於人故發為文章光焰有不可掩如此予方歆艷二公以為不可幾及客有授予文一編者讀之見其辭韵沈鬱類柳公體裁嚴簡又絕似黃公驚而問焉乃二公之鄉弟子宋君濂之為也因作而曰大哉文乎不可無淵源乎西京而下唯唐宋為盛宋姑不論以吳興姚鉉所集唐文粹觀之奚啻三百餘姓雖張蘇蕭李常揚之流氣逸辭雄

各自名家終不能返于古何哉無所宗也獨韓愈氏吐  
詞持論一本之六經然後斯文煥然可觀故凡經其指  
授者往往以文知名于一世夫渾涵彌綸之道淳龐冲  
雅之音欲藉是以宣揚之使其文字各從職而不紊苟  
不傳之於師奚可哉我國家混一以來光嶽之氣不分  
大音斯完中統至元間豪傑之士布列詞垣難以一二  
數天歷以來海內之所宗者唯雍虞公伯生豫章揭公  
曼碩二公而已二公之所指授其必有異于庸常哉設

以韓愈氏方之二公則濂當在李翱皇甫湜之列也予雖不能文不可謂無意于斯譬猶候蟲而時一鳴也其視二公黃鍾大呂之音果何如也竊喜金華山川之秀代不乏人而二公之學有所傳故因序濂之文而敢志其私焉

江浙省郎中實喇卜伯溫之官序

國家制行省以莅外服體勢侔中書以所制者遠所統者衆所寄者為甚重也然而以勲戚大臣之柄政於上

也連帥牧守羣有司之稟命于下也乃使數君子者於  
其間綜治文牘論定可否欲上無所拂而事中律度下  
有所受而物順軌則使百十郡邑之民無或有愁苦之  
歎而政無不成者則幕僚之為任亦難矣然而舉同幕  
之議而顓裁之猶以其身任責於上下而不得有所顧  
避者則元僚之為任尤難也而況任是責於江浙又有  
尤難于他省者乎至元六年山北廉訪副使實喇卜伯  
溫除江浙行省郎中蓋慎選也伯溫精明而醇愿閭閻

而縝理通經學古而用之不迂練覈吏事而本之以仁義凡前代治亂得失之迹與所厯山川形勢城邑廢置民物豐耗以至今今張弛之所以不同者皆有所考證以致其用世之心焉故內而為監察御史外而為諸省宰士諸部使者聲稱皆大聞於時若伯溫者固宜從容著定以贊襄天子之大化乃復屈寘遠外使任其所尤難者無以方今之江浙有不得不寘若人于上府固不暇為伯溫計耶嗚呼東南民力竭矣而一省所上土賦



恒居天下十六七伯溫所任之尤難者有不在于茲乎  
夫有嘉樹也必務培其本而後落其實而食之今江海  
之上有嘉樹焉伯溫往封植之它日余南還從伯溫休  
于樹間以觀秋風之落其實也

靜觀齋吟藁序

三百篇而下漢魏諸詩弗可及已晉宋間則陶淵明為  
最高後世之務為平澹者多本諸此然而甚難也蓋平  
則貌凡澹則味薄為平澹而貌不凡味不薄此以為甚

難也唐大名家如杜少陵諸人不得專以是體論之若  
常蘇州輩其亦平而不凡澹而不薄者乎蓋其天趣道  
韻之妙有非學力所能致者鮑溶輩固徒苦耳余久在  
京師四方瑰奇偉麗之觀萃焉比得鄱陽劉芳伯之詩  
而觀之何其獨為是平澹者也余聞芳伯治易書詩三  
經沉潛理性之蘊則其養于中者有素矣平生隱居清  
澹之鄉日與雲煙水石相上下悠然以忘老則其誘于  
外者無所乎入矣中有所養而外無所誘則其寫之於

吟詠之間者豈世之學為詩者所能至哉余雅慕古製  
以家貧逐祿奔走無好懷時有酌應之作皆不過所謂  
貌凡而味薄者每一篇成令人自厭數欲力變其所為  
卒不能變而止耳何日從芳伯山水間盡洗塵抱叔清  
氣而養之或者其可以少自變乎能少自變則進而與  
芳伯共攀前人之逸轡而相與往來于寥廓之表芳伯  
名傳其先有曰字者慶歷二年進士官至祕書丞弟定  
皇祐二年進士官至吏部侍郎與蘇文忠公為友文學

之緒遠矣

陳允恭捕蝗序

至元又六年之夏六月大興尹以京畿蝗聞于朝俾其屬來傳往捕之蒙古學教授陳允恭數泣賑糶有能績至是委捕蝗寶坻允恭循行五十八社見蝗甚而役夫社不滿百諸社不過六七千又皆其人之貧且瘁者允恭悉遣散去更集富有力者得二萬餘人使伐蝗其法用牛犁田側為長塹中為子井以葦席席壁其一面驅

蝗入其中殺而瘞之燥敗稼者有罪縣長吏以下咸受  
要束以告戒其民允恭見蜾之在北鄉者布地十五里  
念沴菑之作恐人力不足以勝之則出私錢具禮神之  
物禱于其鄉之神旦日父老來言蝗之大者食其小者  
殆盡矣於是復設具禱城隍神既而諸社皆來言蝗去  
矣其在者皆自死矣允恭審其然因告之曰今天子仁  
聖百神受職故蝗不為災爾民亦知之乎父老皆曰是  
固然亦官賢明能勝委也乃皆聯帛為廣幅緣以色繒

書贊譽之辭以送之余聞而言曰詩不云乎田祖有神秉畀炎火去蝗信有神也而感神則有道也夫民心者神之所馮而感應之機在焉怨結于田野之間既足以召菑及捕蝗令下又大擾其人而使貧且瘁者服其役是固感神之道乎古之賢守令能使孽蟲不入其境者非有他術亦惟致謹於感應之機而已矣允恭廉敏而惠慈善聞已播於賑糶之日及至寶坻揀菑恤窮之心藹然見諸行事神喜其所為故禱之即應可謂得感神

之道者矣嗟乎由京師以至窮海之民皆吾君赤子也  
安得臨民者皆如古守令之能弭盜以厚其生乎吾即  
近以度遠蓋不能無所感矣允恭未嘗有民社之寄徒  
沿檄粗見一二已若此所謂一命之士有足以濟夫物  
者其允恭乎吾之所以叙其事者亦將告夫勢位之愈  
于允恭者也

送蘇伯脩治書西臺詩序

至元又六年之冬十月吏部尚書蘇公伯脩拜西行臺

治書侍御史薦紳先生暨諸能詩者相與託物命題分而賦之以寓比興于飲餞之日而屬余書其右簡古之人以王命而之四方也則朝之公卿大夫士賦詩以送之所以導至意詠美德而諷勉之也尹吉甫送申伯之詩曰申伯之德柔惠且直送仲山甫則曰仲山甫之德柔嘉維則又曰柔亦不如剛亦不吐何其善言君子也蓋君子之道時措乎至中又豈有柔剛之偏哉昔者伯脩之久處乎文儒之館也人第見泯泯默默惟沉潛載



籍他無若所能者一旦拜監察御史發精明於溫厚之中所至平反宿冤釐正百度雖風裁凝遠而未嘗有不近人情之態更歷中外展采指事凡能更以為難者皆從容治辦雖才詣過人而未嘗有求勝于人心蓋其天質之美又善學以成其德不剛不柔其殆尹吉甫之所云者乎世之儒者類以異懦不事事為世詬病或以才稱又往往務為狡黠不款實以取棄於君子之二者皆質之偏而不善學者也國家設兩行臺西臺獨控四

省地而治書之為職前代所謂協律令者也律令者官司之守而生民之休戚繫焉以是而委諸質之偏其可乎哉伯脩可謂宜於其職者矣夫物之在天地間高下巨細壯弱動靜之萬不同者其質固不能以不偏也故推一物以為喻不若羣彙之博依擅孤唱以寡和不若雅曲之並奏此分題賦詩之所以能具夫形容之妙而鳶飛魚躍之趣有不可勝言者矣伯脩將即諸賢所詠之物以益驗夫道體之著得詩人言外之意以益感夫

性情之微律令之協其亦在於此乎雖然吾黨之所以望伯修者不止在茲行也

送俞伯康巡檢序

昔者聖人之制深衣也可以為文可以為武可以擯相可以治軍旅蓋士之為學干戈羽籥與誦絃禮書並習也既學而入官則無施不宜後世文武殊科士之為用始有不通者矣國朝念儒者淹積選曹有終身不得一命者而遠方游徼之官恒缺于是以當為州郡校官而

齒未暮者充焉夫儒者平日雅雅馴馴心神智術不越  
乎筆研文字之間一旦擁裘函持弓矛逐捕姦詐寇攘  
于山區海聚之出沒亦難矣故前後之鰥厥官者常相  
踵宰相知其然以為寧使之激厲以效用不忍使之空  
老于草野而止也夫今之為教雖與古人不同然明體  
適用之學亦有可得而講焉者士何為而不是之學哉  
吳郡俞伯康謹飭而茂達其父邦亮先生有古學嘗著  
書說東南學者多宗焉伯康克世其學又蚤與世故相

周旋為庠序師所至以賢能稱今去為邵武泰寧之朱  
口巡檢吾知其又以賢能稱矣庠序師與游徼固大不  
相類然善用其才者隨所處而得其道譬良工之制器  
也為方則極其方為圓則極其圓不善為方而曰我善  
為圓吾不信也李伯紀丞相脩文武之資能却大敵平  
大盜天下惜其亟黜而不用至今士大夫論宋世之事  
未嘗不於公之出處而三歎焉詩云高山仰止景行行  
止伯康仕公鄉邦豈不亦有所興起乎毋謂巡檢位卑

不敢上援李伯紀事余欲伯康效李伯紀不以位言也

杜德明同知唐州序

京師故家能禮賢士以成其子弟者稱杜氏杜氏起武  
升至左丞公為刑部尚書于世祖皇帝時能平亭疑獄  
活垂死者甚眾其子太常公連典大郡有惠政其民至  
今思之父子既皆樹德以益殖其世太常公又以為子  
弟不可以不學也不學則將落吾殖也乃開館舍延師  
儒使諸子受業學士大夫至其家必治具使其子奉觴

豆周旋以叔聞見之懿公之夫人又克相其志于是伯  
子德宏仲子德明皆以文學稱搢紳間德宏用祖廕仕  
今為河南府推官矣德明亦以父廕同知唐州昔太常  
欲館余與德明講學以余方教國子不可去而止及余  
自江南還京師則太常已捐世久矣德明念其父之有  
遺言也因內兄翰林趙大本致余于其塾日夕相與論  
道藝凡七閱月情誼既篤則相與不蚤為恨以終當別  
去為憂也屬余丞冑監德明唐州之遊騎亦至將行謂

余曰今別去矣能無一言以贈我乎余惟昔之仕者士與公卿家子弟二者而已而士有窮居讀書于林野閭巷之陋邦國廟朝典章儀文之盛未覩也一旦以其荒容疎言出與物接往往持古人所不可行于今者而強行之至於敗路為世鄙笑者何可勝紀故或者謂用門閥子弟為愈于此以其父兄習見于平日者足以施于時也然子弟類皆不近儒生厭方冊服玩宴樂以有官位六籍所載與凡古之人良法美意槩有所未知也其



所習見者果足以應方來事變之無窮者乎士與子弟胥失之蓋如此德明席累世官業之舊從乃翁歷中外習見者既富而復治吾黨之業殆欲兼得所謂胥失之者持此以往吾知唐州之有善治也唐州土沃俗美而訟簡公田之入足以養親遇賓客將無有戚子之心者視事之暇尚與州之秀民老人講求前聞以增益其所未知為他日大用之地也

張武定廟堂詩序

幽并多豪傑之士以忠孝著當世又能以義處死生之際則武定張公其人焉公燕之東安人諱宏綱字憲臣  
驍勇有智謀自少從軍能擐甲超騎年十八父忠烈公  
為仇家所陷旦日將就戮武定夜入獄奮挺擊守者踣  
三人眾不敢動遂與父俱逃主將復繫其母營中又竊  
負去世祖皇帝未臨御時親帥師伐宋募集勇士公父  
子應募從攻鄂州先登世皇還即大位扈駕北征又從  
大帥阿朮徇地漢淮諸郡宋將夏貴兵寡強丞相伯顏

每以公父子當其鋒輒勝之宋相賈似道駐兵丁家洲則為先鋒却之與張世傑戰焦山與姜才戰揚州以至滅宋征交趾平廣西洞蠻公父子戰功居多公由忠顯校尉累官至昭勇大將軍以其兵鎮江陰又移戍淮東之通州二州之民皆安焉大德五年有劉深者言西南夷曰緬國者可以兵取朝廷授深行省右丞使以兵往深與公有宿讐迫公同行公年六十五矣計不得脫則曰即死深手不若死于戎行吾其擇死所乎至鬼州畫

計深皆不從驅兵入險阨餽運不繼士卒飢憊不能戰  
深棄軍宵遁公遂力戰以死及檣歸燕山通州之民迎  
祭不勝悲乃相與立祠堂祀之公卿大夫與凡朝野之  
士皆為歌詩以哀悼之父歿之二十四年制贈宣忠秉  
義功臣資善大夫湖廣等處行中書省左丞上護軍追  
封齊郡公諡武定以公子集賢直學士漢之請也後至  
元四年漢以通人之新武定祠也與其子孫親戚言曰  
吾年雖七十餘又目青久不能視然當往新祠燎黃以

告天子之有嘉貺也并以羣賢所為廟堂歌詩鋟諸梓  
庶吾父之所以死者白於世也具舟且行俄疾作不起  
子元永等痛其父之不得終厥志也乃以向所梓詩竟  
刻之騷體居首長歌次之五七言唐律又次之作者之  
名位高下與夫歲月之先後不計也元永以旅嘗見于  
其父使序其編端嗚呼人孰無死而死有重于泰山亦  
有輕于鴻毛當深宵遁時不戰死終亦為深所害害必  
名不善不善則身與節俱喪于其手矣公既得死所則

雖殞其身而平生之所存者不亡也使天下後世誦廟堂之詩哀公之心而想見其為人公不尤存於無窮乎公之子孫所以拳拳於是詩之傳者蓋以此耳張氏自武毅公以來能以忠孝世其家學士雖不以甲冑效用為監察御史以直言論國事幾危其身服勤祖父之事則至死而後已可謂能具忠孝之節者矣元永兄弟又克樹立以繼承先志天其昌忠孝之家使多賢子孫以永其休聲乎

送顧達卿安豐縣尉序

廣信顧達卿由四門生補吏以年勞得尉安豐而徵言  
於余余告之曰安豐在宋世為鄙民習戰鬪攻劫豪勁  
難揉馴自國家混一以來舊俗日變戰鬪攻劫者皆服  
勤農畝豪勁者皆轉為良善又其地廣沃足衣食無隄  
苐之警承平蓋六七十年矣為尉于此者亦何幸而與  
斯民相安於斯時乎吾嘗見尉逐捕寇盜所至犬雞弗  
寧往往縱求盜噉為惡者引善族以濟其貪欲又或藉

是以為功名夫尉以靖民也而尉則擾之尉以除賊也而尉則賊之民焉用若是者之尉其邑也達卿歎憊而闔敏久從搢紳先生知所以為學者矣今之安豐也宜以忠信甲冑仁義干盾保衛斯民于泰和之園使盜畏尉而民不知有尉則為尉之道得矣

送李守中下河巡檢序

鰲溪書院山長李君守中之謁選吏部也以校官闕少借注賴之寧都州下河巡檢將行以奎章學士蜀郡虞



公所為序示余求一言繼其後虞公善守中之能長鰲  
溪也以為昔人置書院易郡縣學之所以為學者意欲  
守中得教授一郡則以昔人之施于書院者而施于所  
教之郡學又恐郡學拘時文之習不得如在書院之為  
者夫使守中得為教授猶恐有所不得為者今以游徼  
為職則雖郡學之所為者不得為矣況得為昔人之所  
施于書院者乎守中是行則尤非虞公之所望也雖然  
書院治為已之學也以是為教則無往而非吾施教之

地也古之行于吏治與講于庠序者非有二道故在泮有囚馘之獻而謀帥亦有詩書禮樂之選孰謂游徼之地不足以施昔日之施于書院者乎守中誠能以所以為山長者為巡檢使其人皆被服文教無敢為非義者則下河之民皆吾書院之弟子也虞公聞之則亦莞爾而笑矣

送盛克明貳泰州稅使序

余聞揚州盛克明之名久矣每從江南上京師艤舟邗

溝輒不得一邂逅今歲克明北游與其里人陳新甫見  
余于居賢坊之官舍觀其言論風致信佳士也至問其  
生平出處之概則若有不釋然者一日新甫為余言克  
明先為隨州學正淮東宣閫辟為掾尋以誣去檄改荆  
湖北道掾以親老辭它閫知其誣于誣而愛其有才也  
乃皆以書來辟皆謝不就河南省平章全公好崇獎賢  
士謂不可使克明事刀筆窪窪薦為廬州之景賢書院  
山長山長歲滿當教授一郡吏部以闕少借注泰州稅

課副使監察御史為辨前誣而洒雪之所不釋然者一  
旦釋然矣余觀克明掾淮東時事蓋易所謂行人得牛  
邑人之灾者歟天理不可誣而公論著於朝廷則所謂  
天下雷行物與无妄者歟苟无妄而得灾則不宜有以  
動其心也天理之无妄不足恃也及公論既著則亦无  
妄者之必然也非有不當得而得之為可喜也克明家  
貧親老無以為養而官輒坎坷不能不動其心今坎坷  
既平而泰州去家又近足以便于養其親耶克明不釋

然于昨日與釋然于今日者其心甚可念也

程氏連理木詩後序

程時叔先生在史館時余助教國子暇日數往來相好也四子仲曰徐叔曰賚皆國子生時叔富經學敦行誼子皆雅飭嗜學其父歿已久愈益輯睦願相與樹立以無墜其父之所存者于是其家棠梨有連理之祥翰林學士歐陽公序之詳矣徐與賚後屬余叙其後夫人與物同得天地之氣以生者也為兆物之物而能物夫物

者人也故夫物之為妖為禎者皆人心有以致之況是木也而父之所手植而兄弟朝夕之所徘徊而顧瞻焉者豈不亦曰吾身親之枝也兄弟同一體也其本同則其枝弗可以相遠也觀物而興感積誠以動物感而動動而應者有不在於茲乎昔者詩人以扶杜興獨居而無兄弟扶杜者特生之棠也無兄弟則如棠之特生兄弟友愛則棠梨之連理見于其家宜矣嗟乎世之人自剪其枝葉以至戕其本根者蓋有之矣君子之於程氏

也能不喜聞而樂道之乎而兄弟宜益封殖茲樹余南  
還道出句章當為子賦角弓之詩諸賢所為詩子則為  
我歌之

佩玉齋類彙序

江寧楊先生以學行文章著當代然攷其平生出處在  
朝廷之日殊少晚歲待制禁林即又以病去尋以老致  
其事人謂先生得久於其位則所以鬯宣皇仁而斧藻  
休光于無窮者宜何如夫何造物者鍾以至美而嗇於

大用使忽忽以老徒以所蘊日授其所從游者而已豈積之久者其發遲約于前固所以裕于後耶先生二子皆賢而有才伯曰文舉訪余錢塘官舍知余嘗業觚翰以為食者出示近藁一帙其言騁而不放嚴而不靡敦樸而不野刻雕而不鑿蓋非徒文也學殖于內而文達于外也其用功亦不淺矣冠士冠服士服林林乎肩摩而踵接也求士之實不得一二焉況求一家父子兄弟之皆有其實乎吾楊氏者可謂卓然出於千百之中造



物所以與之者獨甚厚猶以先生不大用而疑造物之  
嗇者細人之膚見也文舉貌頌齒富仕進方開殆與其  
弟聯軌並進以所學發于事業而炳如丹青者著于典  
冊之盛人將曰楊先生所未用者今於其子用之矣則  
先生未嘗不大用也嗚呼人之望文舉兄弟也亦重矣

鄭濤字序

初予讀浦江鄭氏家範嘆其扶導之有方意必多佳子  
弟出于其間恨未之見一旦列讌于祭酒之堂忽鄭深

仲幾自外至且謂予曰深弟名濤已嘗筮賓行三加之  
禮字之曰仲舒矣濤慕先生之風當深來燕時濤再三  
為深言欲求先生之文以自勗今深將南轅願先生有  
以教濤也予復之曰是惡用余文為哉余自閩南北走  
京師六千里間嘗冥觀水之文矣初踰錢塘見怒濤  
自海門來神怪墮突不可具狀縱者橫者趨者迎者昂  
者俯者衝而鬪者欲升而復偃者奮將擊而回薄者雷  
霆方驚而風雨至者萬騎裹甲乘秋風而疾驅者予竊

意水之文已止於此而他水不能皆然也及渡大江也亦然非惟大江也及沂黃河也亦然江與河雖不如錢塘之潮汐有時而水之文相與衝激而成則無少異予又竊意天下之水唯相激然後成文不激則不能文也及休沐之餘與鑾坡諸公遊西山大湖間風挾水作聲勢無異于昔時所見者迨夫天開風定向之怒濤舒而為平夷一碧萬頃雲光下映塵埃不驚翔禽游魚飛泳左右靡不粲然可觀予方悟水之至文原在此而不在

彼也天下文之妙者其能越是乎是知駕風鞭霆噴沙裂石者乃文之粗冠冕佩玉屹然山立動中矩度者方為文之至者也今以濤之名若字言之雖韓愈氏復生論文之妙亦不過此濤但當如司馬子長汴淮浮洛歷觀海內名山川以昌其文氣則天下文之妙者將在濤矣惡用予文為哉惡用予文為哉予聞濤蓋鄭氏之佳子弟治進士業甚精予知其必見用于時故以古之學文者告之庶幾有以復于濤也他如脩身閑家之道則

具載家範濤蓋行之有素矣予何言哉

安雅堂集卷五